



SUNS EUROPE 2019: al vinç il talent di Magalì Sare

Cul so stîl unic, che al cumbine elements jazz e musiche classiche, la semplicitât dal pop cu la complessitât dal progressive, Magalì Sare e à vint la cuinte edizion di Suns Europe, il festival des arts in lenghe minorizade. L'event inmaneât di Informazione Friulana cul sostegn finanziari di Regjon F-VJ, ARLeF - Agenzie Regionâl pe Lenghe Furlane, e Fondazione Friuli, cul patrocini dal Comun di Udin, dal Consei de Europe e dal NPLD si è sierât sabide ai 30 di Novembar, al Teatri Gnûf "Giovanni da Udine".

«Pe originalitât dal ritmi e pe particularitât te esibizion. Pe presince sul palc e pe paronance vocâl grandiosis. Pal test de çançon, cul so messaç cetant impuartant al ven trasmetût in maniere perfete» la jurie tecniche internazionâl e à premiât la vene compositiva inesauribile di cheste fantate che, a 28 agns, e somee jessi une des artistis plui brilantis e prometentis de sene musicâl catalane. Seconde posizion pai Mocker's (Païs Basc), che a puartin l'hard rock e la psichedele. Tierç il cuartet punk galês dai Sybs. Al à conquistât il public, invezit,



Fotografie di Fabrizio Rigo

Leon Moorman de Basse Sassonie, premiât di Sabrina Rasom, vicepresidente dal NPLD e di Eros Cisilino, president de ARLeF che al à ricuardât cemût che *"Suns Europe al sedi cence dubis un progjet di ecelence tal setôr artistic, che la ARLeF, e à contribuît a ideâ e che e sosten za de prime edizion parcè che e met adun in Friûl la grande sioretât espressive des diviersis culturis di minorance, rindint evidents i valôrs dal plurilinguism. Un festival dai zovins e pai zovins, che al fevele di identitât in tiermins modernis e che al met in coession i miôrs talents artistics cuntun public internazionâl."*

Presentâts di doi cjantants - il rapper furlan Doro Gjat e la cjantautore ladine Martina Iori - sul palc si son esibîts i Malasorti de Sardegne, Mattiu Defuns dal Cjanton dai Grisons, i Son of Fortune des isulis Faer Øer, i galizians Ataque Escampe, i ocitans Mauresca Fracas Dub e Silvia Michelotti pal Friûl.

Grande sodisfazion pal nivel cualitatîf di un festival siôr di apontaments, tra chescj *Scuele Europe / School Europe*, la lezion concerti organizade de ARLeF par 400 students des scuelis secondariis di secont grât dal teritori furlan, che ur à ufiert i elements essenziâi par rifletî sul pluralisim linguistic e culturâl tant che valôr, dirit e oportunitât par ducj.